

CENTRALNA BANKA
BOSNE I HERCEGOVINE



ЦЕНТРАЛНА БАНКА
БОСНЕ И ХЕРЦЕГОВИНЕ

INFO CBBiH



U ovom broju:

U CBBiH IMPLEMENTIRAN
SISTEM UPRAVLJANJA
DOKUMENTIMA – DMS



PREZENTIRANI REZULTATI
PROGRAMA BILATERALNE
POMOĆI IZMEĐU CBBiH I
VLADE ŠVAJCARSKÉ



SVJETSKI DAN ŠTEDNJE U
CBBiH



Izdavač: Centralna banka Bosne i Hercegovine;
Adresa: Maršala Tita 25, 71000 Sarajevo

Priprema: Služba za odnose sa javnošću

Prevod tekstova na engleski jezik: Služba za odnose sa javnošću

Lektura (jezici bh. naroda i engleski jezik): Služba za publikacije i biblioteku i
Služba za protokol i prevođenje

Web stranica: <http://www.cbbh.ba>
E-mail: pr@cbbh.ba
kontakt telefon: (033) 278 123

U CBBiH IMPLEMENTIRAN SISTEM UPRAVLJANJA DOKUMENTIMA – DMS



Tokom 2016. godine, Centralna banka Bosne i Hercegovine (CBBiH) počela je s implementacijom projekta digitalizacije procesa upravljanja dokumentima i predmetima u kancelarijskom i arhivskom poslovanju pod nazivom Document Management System – DMS. Ovaj projekat je realiziran uz pomoć Njemačke asocijacije za međunarodnu saradnju (Deutsche Gesellschaft für Internationale Zusammenarbeit GmbH – GIZ), koja je za potrebe CBBiH nabavila softversko rješenje OWIS koje je implementirala kompanija ORKA d.o.o. Implementaciju projekta u CBBiH vodio je Tim za implementaciju.

Tokom prve faze, koja je zvanično počela sredinom 2016. godine, u CBBiH je obavljena instalacija softverskog rješenja, pisarne u Centralnom uredu i glavnim jedinicama i filijalama su osposobljene za upravljanje predmetima, a paralelno s tim se vodilo postavljanje 100 korisničkih licenci koje su isporučene sa sistemom. Tokom ovog procesa, izvođač radova je implementirao sve elemente kretanja dokumentacije u skladu

s potrebama, praksama i pravilnicima CBBiH. Sa svoje strane, CBBiH je radila na opremanju postojećih pisarni s adekvatnom opremom za skeniranje i obradu dokumenata, te pokrenula aktivnosti na izmjeni odgovarajućih internih akata.

S početkom 2017. godine, počinje jednogodišnji testni period – period tokom kojeg će predmeti zavoditi paralelno, na „tradicionalni“ način putem djelovodnika predmeta i akata i putem elektronskog upravljanja dokumentima, s ciljem da se od početka 2018. godine pređe isključivo na elektronsko upravljanje dokumentima. Cilj ovog prelaznog perioda jeste da se uoče i otklone eventualni nedostaci tokom „živog“ rada, te da se razviju dodatni moduli koji se u svom radu naslanjaju na DMS – modul za javne nabavke, modul za upravljanje sjednicama i modul za najave. S obzirom na to da proces kretanja dokumenata unutar institucije uključuje sve uposlene, CBBiH će tokom godine poduzeti aktivnosti da se u DMS uključe svi uposlenici banke.

Prednosti uvođenja ovakvog sistema su višestruke – prestaje potreba za manuelnom distribucijom predmeta, proizvodnjom velikog broja kopija u slučaju da se isti treba slati na više korisnika, čime se ostvaruju značajne uštede. Ovaj sistem također omogućava lakše praćenje statusa predmeta, zadavanje rokova po predmetu i lakše pretraživanje starih predmeta. Kada bude u potpunosti operativan, ovaj sistem bi trebao predstavljati veliku podršku efikasnijem i bržem obavljanju svakodnevnih poslova u CBBiH.

VISOKI ZVANIČNIK MINISTARSTVA FINANSIJA REPUBLIKE FRANCUSKE U POSJETI CBBiH

U posjeti Centralnoj banci Bosne i Hercegovine (CBBiH) 06.10.2016. godine boravio je Jean-Marie Demange, ministar savjetnik za ekonomske poslove pri Ministarstvu finansija Republike Francuske i šef Ureda za ekonomske poslove regije Dunav-Balkan sa sjedištem u Sofiji.

Visoki zvaničnik francuskog Ministarstva finansija, s kojim je razgovarala vodeći ekonomista CBBiH dr. Belma Čolaković, bio je zainteresovan za opštu makroekonomsku sliku u zemlji. Vodeći ekonomista CBBiH je akcentirala pozitivne pomake u BiH, od iskoraka u procesu pridruživanja Evropskoj uniji, potpisivanja Proširenog aranžmana s Međunarodnim monetarnim fondom (MMF), trendovima u inflaciji, ekonomskoj aktivnosti i politikama komercijalnih banaka, očekivanim i otpočetim investicionim projektima, prvenstveno u oblasti infrastrukture i energetske sektoru,

fiskalne konsolidacije i vezi između finansijskog i fiskalnog sektora, do kreditnog rejtinga.

Razgovarano je i o efektima dinamike implementacije Reformske agende, a gost iz Francuske se interesovao i za trendove u bankarskom sektoru, a informisan je i o izmjeni politike obavezne rezerve CBBiH i ciljevima njene izmjene.

U vezi pitanja s procesom revizije kvalitete aktive (AQR) u bankama i navodima o izloženosti CBBiH bankama u eurozoni, vodeći ekonomista Belma Čolaković je objasnila da je AQR bio preduslov za odobravanje Proširenog aranžmana MMF-a s BiH, kao osnovne karakteristike procesa investiranja deviznih rezervi CBBiH i prirodu i visinu izloženosti Deutsche Bank.

PREZENTIRANI REZULTATI PROGRAMA BILATERALNE POMOĆI IZMEĐU CBBiH I VLADE ŠVAJCARSKE



U Centralnoj banci Bosne i Hercegovine (CBBiH) je 25.10.2016. godine, održana prezentacija rezultata Programa bilateralne pomoći i izgradnje kapaciteta centralnih banaka, koji uz podršku Vlade Švajcarske, implementira Institut za međunarodne studije (Graduate Institute of International Studies – GIIIS) iz Ženeve.

Cilj programa je da se CBBiH omogući pristup tehničkoj ekspertizi i najboljim međunarodnim praksama u sljedećim oblastima: monetarna politika, unapređenje procesa upravljanja deviznim rezervama, statistika i upravljanje ljudskim resursima kroz obuku iz ekonometrije, razvoj finansijskih modela, unapređenje kvalitete analize statističkih podataka i poboljšanja analitičkih i istraživačkih kapaciteta. Rezultati predviđeni Sporazumom o Programu bilateralne pomoći i izgradnje kapaciteta centralnih banaka su vidljivi, te je Centralna banka iskazala interes za produžetak Sporazuma i nastavak Programa do kraja 2017. godine. Od posebnog značaja je jačanje analitičkih i istraživačkih kapaciteta u smislu sticanja tehničke ekspertize kroz ekonometrijska znanja u sklopu radionica i seminara realizovanih u okviru Programa. Pri tome je analiziran uticaj unutrašnjih i vanjskih šokova na bh. ekonomiju, te je sljedeća faza izrada projekcija u skladu s najboljim praksama koje se primjenjuju u centralnim bankama.

„Švajcarska je imala odličnu saradnju sa Centralnom bankom Bosne i Hercegovine tokom proteklih godina. Veoma smo zadovoljni interesom i zalaganjem uposlenih u Centralnoj banci da prošire svoja znanja u više oblasti, te razmijene iskustva s drugim centralnim bankama, uključujući i Švajcarsku narodnu banku. Naša saradnja nije ograničena na ovaj projekat. Sa Centralnom bankom radimo i na području novčanih doznaka

i finansijskih statistika vlada putem projekata koje provode naši partneri, Svjetska banka i Međunarodni monetarni fond,” izjavio je zamjenik direktora za saradnju pri Ambasadi Švajcarske u BiH David Kramer.

Guverner CBBiH dr Senad Softić je u obraćanju tokom prezentacije rezultata naglasio da je poseban kvalitet Programa vrlo otvoren partnerski dijalog, te praktičan pristup zasnovan na punom razumijevanju specifičnosti i potreba CBBiH, te izvrsna saradnja s Institutom iz Ženeve i prenos znanja od vrhunskih stručnjaka i renomiranih profesora. Guverner Softić je podsjetio i na izuzetno korisnu edukaciju za menadžment CBBiH u svrhu unapređenja vještina liderstva i rukovođenja. Dodatno, svi seminari i interaktivne radionice koji su održani u okviru Programa podstiču razmjenu informacija, znanja i iskustava između različitih odjeljenja i rezultiraju poboljšanjem ukupnih rezultata rada.

CBBiH kontinuirano radi na jačanju institucionalnih i stručnih kapaciteta u cilju usklađivanja s međunarodnim i evropskim standardima centralnog bankarstva, a ovaj uspješni projekat predstavlja dodatni podsticaj da se nastavi s daljim aktivnostima jačanja znanja, profesionalne saradnje i razmjene iskustava.

„Cijenim što su naši švajcarski partneri prepoznali značaj CBBiH za reformske procese i proces evropskih integracija, te se nadam da ćemo i dalje imati podršku i nastaviti saradnju i u 2017. godini”, kazao je guverner tokom prezentacije rezultata Programa.

SARAJEVO: ODRŽANA 2. FINANSIJSKA KONFERENCIJA FINCONF



U organizaciji magazina „Banke u BiH“, u Sarajevu je 6. i 7.10.2016. godine održana 2. po redu finansijska konferencija FinConf, koja se bavi aktuelnim zbivanjima i novinama u finansijskom sektoru. Pored vodećih ljudi najvećih komercijalnih banaka u BiH, predstavnika Centralne banke Bosne i Hercegovine (CBBiH), entitetskih agencija za bankarstvo, u radu ove konferencije su učestvovali i univerzitetski profesori i finansijski eksperti iz Evropske unije i svijeta.

Ova konferencija se, između ostalog, bavila problemima s kojima se BiH suočava kada je riječ investicijama i kapitalnim projektima, s posebnim osvrtom na ambijent u kojem djeluje finansijski sektor.

Konferencija je bila i prilika da se prezentiraju makroekonomski pokazatelji za BiH, pri čemu je istaknuto da BDP po stanovniku iznosi 30 posto prosjeka EU zemalja, da je nezaposlenost neprihvatljivo visoka, te da privreda nije konkurentna u poređenju s drugim zemljama.

Bankarski sektor je adekvatno kapitalizovan i stabilan, ali postoje segmenti ranjivosti, kao i problematični krediti.

Jedan od panela bio je posvećen putu BiH i njenog finansijskog sektora kao eurointegracijama i obavezama koje će morati biti realizovane kako bi se ovdašnji standardi digli na nivo EU. U okviru ovog panela, u ime CBBiH, učestvovala je rukovodilac Odjeljenja za evropske integracije u CBBiH Renata Barić.

U okviru konferencije, najuspješnijim bankama u 2015. godini dodijeljena je nagrada „Zlatni BAM“ koju magazin „Banke u BiH“ dodjeljuje već 14 godina. Priznanja su dobile UniCredit Bank d.d. Mostar, Nova banka a.d. Banja Luka, Raiffeisen Bank d.d. Sarajevo i Union banka.

UniCredit Bank uručena su četiri priznanja, i to za najveću aktivu, ukupni kapital, ROE – prinos na dionički kapital i ROA – prinos na aktivu. Zlatni BAM za najveći dionički kapital uručen je Raiffeisen Bank u BiH, a nagradu za najveću aktivu među bankama s pretežno domaćim kapitalom dobila je Nova banka a.d. Banja Luka. Po procentualnom rastu depozita u 2015. godini, najboljom je proglašena Union banka.

Rangiranje banaka je vršeno na osnovu sedam kriterija i na osnovu javno objavljenih revizorskih izvještaja za prošlu godinu.

AKTIVNOSTI ZVANIČNIKA CBBiH



Guverner Centralne banke Bosne i Hercegovine (CBBiH) dr. Senad Softić, na poziv Centralne banke Crne Gore, učestvovao je 23.09.2016. godine na Međunarodnom seminaru o bankarskom poslovanju u sadašnjim makroekonomskim uslovima koji je održan u Budvi, Crna Gora. Ovaj seminar, koji se održava u ko-organizaciji centralnih banaka Crne Gore i Slovenije i Ekonomskog fakulteta iz Ljubljane, već godinama okuplja najznačajnije aktere iz svijeta finansija regiona i služi

kao platforma za razmjenu iskustava između predstavnika bankarske industrije, monetarnih vlasti i akademske zajednice.

Guverner Softić učestvovao je u panel diskusiji „Aktuelni izazovi za monetarnu politiku i finansijsku stabilnost“, gdje se sa kolegama guvernerima i viceguvernerima centralnih banaka Crne Gore, Hrvatske, Makedonije i Slovenije dotakao aktuelnih izazova vođenja monetarne politike, posebno u svjetlu negativnih kamatnih stopa Evropske centralne banke (ECB) i njihovog uticaja na ekonomska kretanja zemalja regiona koje su visoko euroizirane. Tokom rasprave bilo je riječi o deflaciji i opasnostima od recesije, izazovima za očuvanje finansijske stabilnosti, te budućim pravcima monetarne politike. Guverner je govorio i o odobrenom trogodišnjem Proširenom aranžmanu između Bosne i Hercegovine i Međunarodnog monetarnog fonda (MMF), pri čemu je posebno istakao odredbe koje se odnose na očuvanje finansijske stabilnosti u državi i povećanje kreditne aktivnosti banaka.

Osim panel diskusije o temi monetarne politike, ovogodišnji seminar se dotakao aktuelnih tema, poput uticaja Bankarske unije EU, sa posebnim fokusom na efekte jedinstvene

supervizije EU banaka, potom upravljanja NPL-ovima i oblikovanja budućih poslovnih strategija banaka u uslovima niskih kamatnih stopa i visoke likvidnosti.

Guverner CBBiH dr. Senad Softić i članica Upravnog vijeća CBBiH mr. Ankica Kolobarić boravili su, od 8. do 10. oktobra 2016. godine u Washingtonu, gdje su, kao članovi delegacije BiH koju predvode predsjedavajući Vijeća ministara BiH Denis Zvizdić i ministar finansija i trezora BiH Vjekoslav Bevanda, prisustvovali Godišnjoj skupštini Međunarodnog monetarnog fonda i Svjetske banke.

Nakon Godišnje skupštine, održan je niz bilateralnih sastanaka sa visokim zvaničnicima Međunarodnog monetarnog fonda tokom kojih je razgovarano o najnovijim makroekonomskim kretanjima, monetarnoj politici, te o nedavno odobrenom trogodišnjem Proširenom programu između BiH i Međunarodnog monetarnog fonda. U razgovoru sa šefom Misije Međunarodnog monetarnog fonda za BiH Nadeemom Ilahijemim bilo je riječi o Pismu namjere i izvještajima tehničkih misija Međunarodnog monetarnog fonda u CBBiH, te aktivnostima koje treba provesti iz Pisma namjere i izvještaja tehničkih misija. Tokom ovih sastanaka ukazano je

na važnost očuvanja valutnog odbora i monetarne stabilnosti, kao i stabilnosti bankarskog i finansijskog sistema u cjelini. Guverner Softić i članica Upravnog vijeća Ankica Kolobarić prisustvovali su sastanku Konstituentne Međunarodnog monetarnog fonda i Svjetske banke, i debati ministara finansija i guvernera centralnih banaka o ekonomskim izazovima u centralnoj, istočnoj i jugoistočnoj Evropi koja je održana na inicijativu Paula Thomsena, direktora Odjeljenja za Evropu u Međunarodnom monetarnom fondu.

Tokom boravka u Washingtonu, guverner Softić i članica Upravnog vijeća A. Kolobarić održali su poseban sastanak sa direktorom Odjela za statistiku u Međunarodnom monetarnom fondu tokom kojeg su ukazali na značaj daljeg unapređenja statistike koju vodi CBBiH, kao jedne od važnih funkcija CBBiH.

SVJETSKI DAN ŠTEDNJE U CBBiH



U skladu sa, sada već tradicionalnom praksom, Centralna banka Bosne i Hercegovine (CBBiH) je druženjem s djecom, obilježila Svjetski dan štednje.

Svjetski dan štednje obilježava se 31. oktobra svake godine, a CBBiH već godinama na ovaj dan ugosti učenike osnovnih i srednjih škola s prostora BiH, koristeći se ovom prilikom da ih, na njima prilagođen način, educira o CBBiH i novcu, te podstakne na štednju. Tako je Sberbank BH u posjetu Centralnoj banci Bosne i Hercegovine dovela učenike Osnovne škole Safvet-beg Bašagić iz Sarajeva kako bi se upoznali o instituciji „u kojoj se čuva novac“, ali i historijskim činjenicama vezanim za bh. novac.

„Drago nam je da smo organizovali posjetu djece Centralnoj banci Bosne i Hercegovine gdje su obišli izložbu starih kovanica i papirnog novca. Upoznavanje s novcem kroz historiju je prvi korak ka upoznavanju značaja novca, ali i štednje“, istakao je

Vedran Peršić, direktor sektora Marketing i komunikacije u Sberbank BH.

Za učenike sarajevske Osnovne škole „Vladislav Skarić“ organizovan je kviz tokom kojeg su djeca mogla pokazati svoje znanje o CBBiH i novcu, te naučiti šta znači štediti i kako štediti. I za srednjoškolce iz Bijeljine, Posušja i Gradačca koji su na Dan štednje, također, posjetili CBBiH, upriličen je kviz znanja finansijske pismenosti, koji su pripremili i vodili predstavnici Udruženja za odgovorno upravljanje ličnim finansijama „U plusu“.

Obraćajući se srednjoškolcima, viceguvernerka CBBiH mr. Ernadina Bajrović se posebno osvrnula na saradnju CBBiH s obrazovnim institucijama, istakavši ulogu CBBiH u finansijskoj inkluziji i finansijskoj pismenosti koju provodi u vidu edukacija, predavanja, obilježavanja Svjetskog dana štednje, objavljivanja publikacija. CBBiH za redovne studente organizuje ferijalnu praksu, za studente postdiplomskih studija studijsku praksu, svima su na raspolaganju publikacije CBBiH i statistički web portal, kao i web stranica CBBiH koja pruža veliki broj informacija i podataka.

CBBiH već nekoliko godina podržava aktivnosti i programe finansijske edukacije, a sastavni dio tih aktivnosti su i posjete učenika i studenata koji iz godine u godinu u sve većem broju iskazuju želju za posjetom CBBiH i interesovanje za njene aktivnosti.

